

WILLIAMS, Syr, WILLIAM (1634-1700), cyfreithiwr a gwleidyddwr

Enw: William Williams
Dyddiad geni: 1634
Dyddiad marw: 1700
Priod: Margaret Williams (née Kyffin)
Plentyn: Emma Owen (née Williams)
Plentyn: John Williams
Plentyn: William Williams
Rhiant: Emma Williams (née Dolben)
Rhiant: Hugh Williams
Rhyw: Gwryw
Galwedigaeth: cyfreithiwr a gwleidyddwr
Maes gweithgaredd: Cyfraith; Gwleidyddiaeth a Mudiadau Gwleidyddol
Awdur: Glyn Roberts

Mab hynaf Hugh Williams (1596 - 1670), rheithor Llantrisant a Llanrhyddlad, sir Fôn ([B. Willis](#), *Bangor*, 170-1; [Pryce](#), *Diocese of Bangor in the Sixteenth Century*, 41, 43, 44; *An Inventory of the Ancient Monuments in Anglesey*, 114). Cafodd ei addysg yng Ngholeg Iesu Rhydychen ac yn Gray's Inn (ei dderbyn yno yn 1650 a dyfod yn fargyfreithiwr yn 1658; etholwyd ef yn drysorydd, 1681). Yr oedd yn gofiadur Caer o 1667 hyd 1684. Methodd â chael ei ethol yn aelod seneddol bwrdeisdref Caer yn 1672 eithr etholwyd ef yn 1675. Ymlynodd wrth y 'Country Party'; oedd yn erbyn ychwanegu at hawliau teyrnasol y brenin, cymerodd arno ei fod yn credu yn nilysrwydd y 'Popish Plot,' pleidiodd yr Exclusion Bill, a chafodd ei ethol yn llfarydd yn ail Senedd Iago II (1680) ac eilwaith yn Senedd Rhydychen (1681). Yn 1684 cychwynnodd ei elyn, [George Jeffreys](#), gyngaws yn ei erbyn am iddo, fel llfaryd, awdurdodi, yn 1680, cyhoeddi *Narrative* athrodus Thomas Dangerfield; yn 1686 dirwyd ef i £10,000 yn Llys Mainc y Brenin. Ar hynny, newidiodd ei ochr - ymheddychodd â'r brenin Iago II, dewiswyd ef yn gyfreithiwr cyffredinol, a chafodd ei urddo'n farchog (1687) Cafodd enw drwg trwy iddo fod yn gyfrifol am erlyn y saith esgob yn 1688 a chafodd ei wneuthur yn farwnig am ei wasanaeth. Newidiodd ei ochr unwaith yn rhagor pan gafwyd chwyldro 1688; etholwyd ef dros Fiwmares i Senedd y Convention (1689-90), a bu'n cynorthwyo i lunio'r Bill of Rights. Serch iddo golli ei swydd fel cyfreithiwr cyffredinol, gwnaethpwyd ef yn King's Counsel ym mis Hydref 1689 ac yn gyfreithiwr cyffredinol y frenhines yn 1692. Gyda [Robert Price](#) o'r Giler ac aelodau Cymreig eraill gwrthwynebodd, yn llwyddiannus, fwriad William III i roddi arglwyddiaethau Dinbych, Iâl, a Maelor i'r [Iarll Portland](#). Etholwyd ef yn aelod seneddol dros Fiwmares yn 1695. Priododd, 1664 â Margaret, merch ac aeres Watkin Kyffin, Glascoed, sir Ddinbych, a'r flwyddyn ddilynol prynodd Lanforda gan Edward Lloyd. Bu farw 11 Gorffennaf 1700.

Syr WILLIAM WILLIAMS, ail farwnig (bu farw 1740)

Y mab hynaf, h.y. y mab hynaf a oroesodd, tad [Syr Watkin Williams Wynn, barwnig 1af Wynnstay](#).

JOHN WILLIAMS (bu farw 1738)

Y mab ieuengaf. Aeth i Gray's Inn yn 1679, daeth yn fargyfreithiwr yn 1686, a dewiswyd ef yn atwrnai cyffredinol siroedd Dinbych a Threfaldwyn yn 1702 a Chaer a'r Fflint yn 1727. Ar ei briodas â Catherine, merch [Syr Hugh Owen, barwnig, Orielton, Sir Benfro](#), sefydlwyd tiroedd ei dad yn sir Fôn a Bodelwyddan (Sir y Fflint) arno. Yr oedd mab hynaf John Williams, sef Hugh Williams (1695 - 1742), yn aelod seneddol dros sir Fôn, 1725-34. Aeth y trydydd mab, JOHN WILLIAMS (1700 - 1787), i Gray's Inn yn 1718 a daeth yn fargyfreithiwr yn 1725. Dilynodd ei dad fel atwrnai cyffredinol siroedd Caer, y Fflint, Dinbych, a Threfaldwyn (1738-55), bu'n ddirprwy prif farnwr cylchdaith Caerfyrddin (1749-1757) ac yn brif farnwr cylchdaith Brycheiniog o 1755 hyd ei farwolaeth, 25 Ebrill 1787.

Awdur

Yr Athro Glyn Roberts, (1904 - 1962)

Ffynonellau

Oxford Dictionary of National Biography

A. H. Dodd, '[The Pattern of Politics in Stuart Wales](#),' *Trafodion Anrhydeddus Gymdeithas y Cymmrodorion*, 1949, 76

A. H. Dodd, '[Tuning the Welsh Bench, 1680](#),' *Cylchgrawn Llyfrgell Genedlaethol Cymru*, vi, 253

J. E. Griffith, *Pedigrees of Anglesey and Carnarvonshire Families* (1914), 18-9

W. R. Williams, *The parliamentary history of the principality of Wales, from the earliest times to the present day, 1541-1895* (Brecknock 1895)

Darllen Pellach

Friends of Friendless Churches: '[The Arch-Trimmer](#)': William Williams of Llantrisant

Dolenni Ychwanegol

Wikidata: [Q7529825](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

